



ATASSUT

UPA 2016/72

Siverth K. Heilmann

01.06. 2016

Tunumi aalisarnikkut piniarnikkullu inuussutissarsiutinik ineriartortitsinissaq, tassungalu ilanngullugu tunitsivinnik attanneqarsinnaasunik pilersitnissaq kiisalu Ittoqqortoormiuni, Tasiilami eqqaannilu aalisariutinik ineriartortitsinissamut pitsaasunik tunngavissaqarnissaq pillugit apeqquteqaat aallaavigalugu oqallinnissamik siunnersuut.

(Inatsisartunut ilaasortaq Hans Enoksen Partii Naleraq)

Aallaqqaammut inatsisartuni ilaasortaq Hans Enoksen Partii Naleraq apeqquteqaat aallaavigalugu oqallisissiamut soqutiginarput qujanaq, imatullu ATASSUT-miit oqaaseqarfigisavarput.

Siunnersuuteqartoq ilumoorluinnarpoq Tunumi aalisarnikkut piniarnikkullu inuussutissarsiutinik ineriartortitsinissaq Naalackersuinnikkut massakkornit pimoorunnerusariaqaripput. Tunumi pingaartumillu Tasiilap nunaqarfittaanilu qangaaniilli, piniartuunermiit aalisartuunermut ikaarsaariartitsineq aallunneqarnikuuvoq, ESU-lu aqutigalugu tapeeriaatsit, umiatsiaqqaniik aalisariutinut, mannaluk tikillugu kitaanut sanilliullugu pitsaanerumik.

Tunitsivinnik attanneqarsinnaasunik pilersitsinissamik siunnersuuteqartoq ATASSUT-miit isumaqatigeqaarput. Nalunngisarpullu unaavoq, aalisakkat piniakkallu tammakartarnerisigut, tunitsiviit pisortaniit pigineqartut pilersinneqarnikkullu, ikilisarneqaannaratik matoorarneqartarmata isaterneqarlutilluunniit. Qujanartumillu illoqarfinni nunaqarfinnilu assiliaataajuareerlutik, aalisakkat takkusimaaleriartornerat ilutigalugu namminersortut pisortallu ingerlataanni, aalisartunut nunamilu suliffissaqartitsinerat annertusiartuinnarpoq.

Taamaattumik ineriartortitsinissamut pilersaarusoqatigiilluartarnissaq, inuussutissarsiornermi tunisassiornermilu soqutigisaqatigiit piffinni assigiinngitsuni peqataatinneqartarnissaat pingaarutilerujussuuvoq. Tunitsiveqanngippammi aalisartut aningaasarsiornaviangillat aammalu akerlianik aalisartoqanngippat nunami suliffiit pilersinneqarnaviangillat.

Naak aalisakkanik misileraatitsinerit tamatigut iluatsitsiviusarsimangikkaluartut, ilisimaneqareerpoq Tunup sineriassuani aalisagarpasuaqartoq, apeqqutaaginnarpoq qanoq nammineq piumassuseqarnerput aammalu politikikkut aqutissiuussinissamut qanoq tapersersuinnissamut piumassuseqarnerput. Namminersortut soqutiginnittut inerisaanissamullu piumassuseqarlutik saqqummertarput, tunitsivitsigulli talittarfeqarnikkullu periarfissaqannginneq ilaatigut pissutaalluni, angorusutaq anguneqanngitsoortarpoq.

Ineriartortitsineq kinguneqarluartumik iluatsilluassappat, suut tamarmik ataqatigiinnissaat pilersaarusiornuarnissarluk avaqqunneqarsinnaanngilaq. Aalisarnikkut, tunitsiveqarnikkut minnerunngitsumillu avammut tunisassiornikkut, misilittakkat pitsaasut sanngeequtillu siuariartortitsinissarput iluatsissappat, siunnersortit matumani pikkorissut amigaataapput.

Nunami tunisassiorfinnik pilersitsineq pitsaasaqaaq, pingaartumillu ukiorpassuarni ataavarsinnaagaangata, taamaattorli ATASSUT-miit aallaqqaammut inassutiginnarpoq, angallatinik puttasunik tunitsivigineqarsinnaallutik nikerarsinnaasunillu, nunaqavissunillu sulisussanik inuttaqartitsinikkut piumasaqaateqarnitsigut politikikkut tapersersuinnerunissarput pimoorunnerussagipput. Aalisakkanik

avammut tunisassiornissamat, timmisartorlu atorlugu misilittagaqarluartut Island suleqatigineqarsinnaanerat, inatsisartuni Naalackersuisunilu isummersornermi matumani ilaatinneqarnissaat ATASSUT-miit sakkortuummik kaammattuutigissavarput.

Ajunngikkaluaqaaq piumasaqaataammat aalisariutit Tunumi sinerissamilu qanittumi misileraalluni aalisarnissamat akuersissumik tunineqarsimasut aalisariutinut mikinerusunut tunitsivittut atorineqarnissaat, taamaalilluni najukkami umiatsiaararsorlutik aalisartut misileraalluni aalisarnermi ingerlatsisoqarnerani tunitsivissaqarnissaat qulakkeerneqarsinnaammat. Tunumilu sineriassuaq annertoqaaq, angallat misileraalluni aalisarnissaanut akornusersussanngikkutsigu, angallatillu anginerumaat kingumut aalisarsinnaanerat periarfissikkutigu, ATASSUT-miit qularutiginngilarput, aalisartut tunitsivitsigullu aaqqissuussineq suli pitsaanerusoq anguneqarsinnaassasoq.

Tasiilap illoqarfittaani, aalisakkanik tunisassiorfimmik namminersortuniik pilerigineqartartoq ilisimavara, taamaattorli aporfiit annerpaanut ilaavoq taliffiusinnaasoq niiooraaviusinnaasorlu, tamatumani kommuune soorunalumi soqutiginnilluni saaffiginnittoqarsimappat, pilersarusioqatigiinnermi ilusilersuinermilu avaqqunneqarsinnaanngilaq. Eqqaamanerlunngikkuma ukiorpaalussuit matuma siornagut nunaqarfimmi Sermiligaami aalisakkanut tunitsiviliortoqarnikuuvoq, polar-oliellu orsiivittaanut ima qanitsigisimammat, tunisisinnaaneq killeqaqisumik ingerlanneqarluni.

ATASSUT-miit nuannaarutigaarput tapersersorlugulu, Naalackersuisoqarfimmiit Tunumi aalisartut 2016-imi suli ESU-mit tapiiffigineqartarnissaanik siunniussaartoqarmat, ineriartortitsinermi oqaasiinnaassanngippat politikikkut tapersersuinissarput avaqqunneqarsinnaanngilaq, kiisalu assut iluarisimaarparput suliniutit allat soorlu motorinik ilinniartitsinissamat akuerisaasumik suleqateqarluni pikkorissaasoqarsimanera.

Ittoqqortoormiut assut avinngarusumiipput, annermik imaani piniarnermik inuussutissarsiorneq ingerlanneqartartoq aammalu umimmanniartitsisarnermik aallutaqarfiulluortoq. Nunarsuarimi kangerluit annersaata paakanniani inissisimasoq, imaq puiserpassualik qilalugarpassualik allanillu piniagassalissuaq, taamaattumillu ilimagineqarluinnartariaqarpoq aalisagarpassuaqarsimassasoq. Piniartoqarfik annertunerusumik aalisarnikkut tunisassiornikkullu ingerlatitsiviunngilaq, taamaattorli ukiua eqqaamannngikkaluarlugu, kilisaammik aalisarnikkut misileraanikkut ingerlanneqarnikuuvoq, annertugisassaannngitsumillu takutitsiviusimanera eqqaamaniarpara.

Ittoqqortoormiut ukiup annersaani sikuusarnera aammalu iluliarpassuaqartarnera umiatsiaamik angalanierneq ulorianarsinnaanera eqqaamalluarpara. Ukiullu makkua sikuusarunnaariartornera malunnatilmik sunniuteqariartornera ilutigalugu, ATASSUT-miit kangerlorujussuup aalisarnikkut misileraanikkut ilisimatusarfigineqarnerunissaanullu, soqutiginnittoqarpat kaammattuinerput matumuuna periarfissat ilaattut apuukkusupparput. Imaassinnaavoq tamatumuunakkut kinguneqarluartumik misileraanikkut iluatsitsiviusoq.

Naggataagut Naalackersuisut umimmaat neqaannik panertitsivissamik pilersitsisinissaq siunertaralugu aningaasaliisimanerannut qujanaq, taamatut iliuuseqarneq tapersersornaqaaq. Siunnersuuteqartartoq aamma ATASSUT-miit qujaffigeqqissavarput, apeqquteqaat allaavigalugu oqallisissiamut pingaarutilimmullu periarfissikkatsigut isummersornissamat. Ilittulli neriuutigaarput, Tunumi qulaani eqqartukkatsinnut pitsaasumik alloriartoqarumaartoq.

Qujanaq.